

Bengkel ADD medium perkasa pengajaran



Norasiah membaca akhbar BH pada program Bengkel ADD anjuran BH di Universiti Malaysia Pahang, Gambang.

[FOTO SYAZWAN MSAR/BH]

» Membantu pendidik lebih proaktif, berdaya saing selaras perkembangan semasa

BH (Timu.)
19/3/13 welsa
ms N3

Oleh Syazwan Msar
bhnews@bharian.com.my

Kuantan

Bengkel Akhbar Dalam Darjah (ADD) anjuran akhbar BH adalah medium terbaik guru dalam memperkasakan kemahiran pengajaran dan pembelajaran khusus untuk meningkatkan prestasi akademik pelajar.

Penganjuran program itu yang mendapat kerjasama Jabatan Pelajaran setiap negeri, dikenal pasti boleh membantu pendidik untuk lebih proaktif serta berdaya saing selaras perkembangan semasa.

Selain menekankan aspek pengajaran dan pembelajaran,

ADD turut menitikberatkan aspek penggunaan akhbar sebagai alat penyampaian ilmu atau maklumat kepada pelajar seterusnya meningkatkan tahap pemahaman mereka.

Guru Sekolah Kebangsaan (SK) Khinchir, Pekan, Norasiah Rafie, 35, berkata penganjuran bengkel itu membantu meningkatkan prestasi akademik terutama bagi murid lemah dalam subjek kritisikal seperti sains dan matematik.

Kandungan lengkap

Beliau yang mengajar subjek Bahasa Malaysia, turut menggunakan sisipan Didik keluaran BH dalam pengajaran dan pembelajaran kerana kandungannya lebih lengkap dan bahan disediakan tenaga pengajar berpengalaman.

“Saya sudah menggunakan

akhbar sisipan Didik selama empat tahun untuk mengajar murid Tahun Enam dan ternyata berbaloi apabila kebanyakan mereka lulus cemerlang dalam subjek Bahasa Malaysia.

“ADD turut membantu saya mempertajamkan kemahiran pengajarannya supaya pelajar lebih mudah memahami subjek ketika dalam kelas,” katanya ketika ditemui di Bengkel ADD anjuran BH di Universiti Malaysia Pahang (UMP), Gambang, di sini.

Bengkel yang dirasmikan Ketua Sektor Pengurusan Akademik, Jabatan Pelajaran Pahang, Jalani Ludin, dihadiri lebih 200 guru dari seluruh negeri ini.

Turut hadir, Naib Canselor UMP, Datuk Dr Daing Nasir Ibrahim dan Pengarang Eksekutif Rencana BH, Zainor Said.

Guru Sekolah Jenis Kebangsaan Cina (SJKC) Maran, Samsiah Omar, 49, berkata bengkel seperti itu perlu diteruskan dalam usaha untuk membangunkan sistem pengajaran dan pembelajaran yang lebih sempurna dan berkesan.

“Kebanyakan murid lebih berminat menggunakan akhbar sisipan Didik kerana mempunyai ilustrasi gambar dan fakta yang menyeluruh, sekali gus meningkatkan lagi tahap pemahaman mereka,” katanya.

Beliau yang berpengalaman menjadi pendidik selama 25 tahun, berkata penganjuran bengkel itu dapat memantapkan lagi teknik penyampaian terhadap pengajaran dan pembelajaran menggunakan akhbar.

Sementara itu, Zainor berkata, matlamat utama penganjuran bengkel bagi membolehkan guru berkongsi kemahiran, kepakaran serta pengalaman dalam aspek pengajaran dan pendidikan, selain memberi pendedahan untuk memanfaatkan akhbar sebagai medium menyebar ilmu pengetahuan.